



# QUÆSTIO MEDICA,

QUODLIBETARIIS DISPUTATIONIBUS  
manè discutienda in Scholis Medicorum, die Jovis  
decimâ-quartâ Decembris.

M. MATTHÆO THUILLIER, Doctore  
Medico, Præsidente.

*Est ne salivæ succus præcipuum chylosum instrumentum?*

I.

**I**N solido & fluido posita est corporis humani œconomia. Solidum dixeris filamenta illa albida plus minus tenuia, parva, tensilia ex quibus veluti toridem tubulis ossa, tendines, musculi, vasa sanguinea &c. contexuntur. Fluidum verò sanguinem, ex quo ceteri quot quot humores velut ex uno perennique fonte derivantur. Partes solidæ in ipso ovulo reperiuntur. Inertes quidem ex se, nulliusque participes motûs, nisi communis partibus matris. Proprius autem à spiritu seminis virilis inchoari exigit. Quamprimùm exigua embryonis moles referata est, quot vires acquirit eundo: crescere enim non desinit ovum explicatum in homuncionem. Tunc hic à matre pro alimento carpit chylum. Nihil unde vel paucum est quod excernatur, penus inutile factum; neque enim amnio contentus liquor sudor est & urina. Adolescens ibi magis ac magis fœtus nonum vix mensem attigit, ut egressum molitur, capite procumbens pudoris claustra petit, referat. Aurâ jam potius liberiore, eodem ferè alimento, sed uberiori vescitur, quia tunc multa dissipat. Ætate provectior, majorem succi nutritii, cæterorumque humorum fraudem hunc pati necesse est, quam refarcire indiget lautiori alimentorum suppellectile.

II.

**U**BERRIMA est alimentorum copia. Multa ex vegetabilium, ex animalium familiâ plurima & exquisita depromun-

2

tur. Alia cum, alia sine artis apparatu edilia: nulla autem nutriendo corpori idonea nisi prius assumantur ore, præviumque ibi, si solida, attritum, collisumque subeant. Ad id enim officii utraque maxilla dentibus armatur, quarum triplicem, naturam, familiam instituit in homine, utpote qui præ cæteris animantibus omnis generis alimentorum varietate gaudet. Alimenta itaque attrita & divisa plus acquirunt superficiei, adeoque energię solventis in ventriculo magis patent, ac deglutitio facilius evadit, non proprio pondere (relativa enim, non absoluta est corporum gravitas) non aëris atmosphærici impulsu ventriculi fundum alimenta petunt. Lingua deglutitionem inchoat: perficiunt pharyngis muscoli: alimenta sic in ventriculum detrusa, indigent macerari ulterius, digereri, dissolvi. Quæ prius enim erant variis distincta coloribus, unius tùm, lactisque similis, coloris fiunt; atque ex variis variè congestis fit chylus unus. Hæc rerum longè discrepantium mutatio, chylosis nuncupatur, quam in ventriculo penitus absolutam affirmare licet. Alia enim est chyli confectio, alia ejusdem secretio; illius officina ventriculus, hujus intestina: hanc absolvit bilis unâ cum succo pancreatico, illam potissimum perficit salivalis succus.

### III.

**C**HYLOSIN coctione confici opinio fuit veterum, sed apud eruditos recentiores & melioris notæ physicos, dudum exolevit. Neque felicius erit fermentationis conjectura, quam sub specie quâdam verisimilitudinis diù promulgatam litteratorum medicorum familia credulis & simplicibus reliquit. Alimentorum solutione nodum hunc expedire malunt. Quàm verò à scopo veritatis aberrant; qui acidi in sthomaco stabulantis, ex arteriarum ostioli: usque defluo operâ solvi alimenta arbitrantur. At positâ, nec concessâ hujus existentia, cui autopsia refragatur, acidum esse menstruum universale quis unquam asseruit quale esse deberet, ut omnis generis edulia unâ veluti clave referaret? magnum inter ipsa acida discrimen esse nemo nescit. Acetum facilius plumbum; spiritus vitrioli ferrum; aqua fortis reliqua metalla, non aurum aggreditur. Atteri, comminuique magis ac magis alimenta non illepidè docent quidam eruditi, per trituram (inquiunt) alimentorum solutio incipit in ore, integram facit ventriculi commolentis motus reciprocos. At at! urna satis capax ventriculus non nisi remisso atque insensibili motu, spatio temporis exiguo eduliorum compagem in segmenta tundit minutissima, quæ vix pistillum aut malleus repeti-

tisicibus assequatur. Præterea multiplicis alimentorum coloris in lacteum commutatio uno partium collisu, sine menstruo solvente, haud facile concipi potest. His adde chylosin non tam alimentorum moliturâ perfici, quam eorum solutione, aut potius extractione, quæ corpori nutriendo, cæterisque animalis commodis cedere debent. Hoc solventis idonei opus est, non cæci trituræ commolentis impetus.

#### I V.

**S**OLVUNTUR minus alimenta quam ex ipsis extrahuntur partes quædam in chylum abituræ; cæteræ menstrui vim eludunt per alium eliminandæ. Menstruum illud est salivæ succus, quippe qui cum plurimis (si non omnibus) & esculentis & potulentis, commodè jungi potest; quin etiam omnibus ferè ac singulis liquoribus tum acidis, tum alkalicis variisque spiritibus hic se se admisceri patitur. Particulis constat aqueis, salinis & oleosis. Aquæ & oleosæ viam sibi faciliè parare possunt, vires addunt salinæ, quæ rigidis veluti totidem aculeis concretorum poros subire valent, strictamque eorum compagem penitus reserare: sic pristina partium junctura ultrò invertitur, quæ rigida priùs duraque fit mollis pulti-formisque eduliorum commissura. Chylus autem quandiu massæ adhuc inexistit, chymus veteribus audit, & tùm colorem, ut plurimum alimentorum servat, aut communem cum illo obtinet, non nisi post secretionem albi coloris conspiciendus; neque colorem hunc ab acido urinosoque sale repetas, sed ex gelatinosis partibus cum aqueis coeuntibus, quæ quoties commiscantur albicantem colorem concedunt. Sic tinctura Benzoes rubicunda; Balzami de Capayua flava, resina Jalappæ fusca; semina diversi coloris, cum aquis juncta, lacteum liquorem constituunt. In album autem colorem salivæ succus, quàm sit mutatu facilis, docent experimenta chymica. Cum spiritu salis volatilis mista saliva, lactis tenuioris instar apparet; & butyro antimonii si jungatur, in totum lactescit, cremoris quæ lactei faciem induit. Succo salivali subsidiariam tantum præbent operam cætera chyloleos instrumenta. Duriorum attritione dentes, suis ventriculus fibris motricibus; dum enim angustatur abbreviaturque, alimenta subiguntur, dividuntur, attenuantur, atque à solvente commodiùs superari possunt. Partium etiam adjacentium calorem suum ad chylosin operam conferre quis neget? Quippe cum inde major accedat menstruo vis & energia.

**S**ALIVALI suoco, ut ex trahendo ex alimentis chylo abundè sufficeret, à naturâ provisum est, quæ hunc ex tot fontibus, partim in ore, partim extrà os constitutis, aut immediatè, aut mediatè per canales in ventriculum deducit; atque ejusdem generis est lymphæ glandularum Oesophagi & ipsius ventriculi ut potè quæ ex eodem sanguine, ab ejusdem generis vasis & glandulis conglomeratis & in eundem usum separari solet. Magni ad chylosin momenti ejus ubertas, modò tamen probè sit constitutus. Minus vegetum reddit chylum factus dilutior, viscosior alimentorum poros omnes usque non penetrat neque dividit satis. Chylosi etiam officit si salus est vel amarus, vel dulcis, vel acidus. Nullius enim saporis esse debet & instar aquæ glutine quodam crassioris factæ fluere. Perpetua sit hujusce succi, nobis inscisci diù noctuque deglutitio. Cum in vacuo ventriculo uberior colligitur, movet ciborum appetentiam, tùm quod ea non adsint in quæ virtutem suam exerat, tùm quod spicula salina, quibus scatet, tunc minùs impedita factaque sui juris, levi corrosione, aut irritatione potius Ventriculum afficiant. Is autem ventriculi sensus fames vulgò nuncupatur. Qui autem liquor famem excitat, is & chylosificationis primarius opifex censi debet.

*Ergo salivalis succus præcipuum chyloseos instrumentum.*

Domini Doctores disputaturi.

M. Alexander Petrus Mattot.  
M. Claudius Bourdelin, Serenissima Ducissæ Burgundia, Medicus perpetuò ordinarius.  
M. Joannes - Franciscus Foy-Vaillant.

M. Alexius Listie.  
M. Petrus-Joannes Burette, Chirurgia Professor.

M. Ludovicus de Vaux.

M. Renatus le Conte.  
M. Franciscus Afforty.

M. Germanus Preaux, Regius & rei Herbaria in Scholis Professor.

Proponebat Parisiis JOANNES-BAPTISTA FERMELHUIS, Vernonæus, Baccalaureus Medicus, A. R. S. H. 1702.

Apud Viduam Francisci Muguet, Regis & Facultatis Medicinæ Typographi.